

Mbunda - Zembeleka Visoneka - Comfort Scriptures

2 Kolinte 1:2-4 Njambi Tatetu na Mwene Yesu Kilstu vamyane kutetela na kwoloka. 3 Tukandeeleni kuli Njambi Ishe ya Mwene yetu Yesu Kilstu, Tate wa mema ku mbunge, Njambi kuje kukatundu vukwasi vvoshe! 4 Ikeye muka-kutuzembeleka mu tuyando twetu twoshe, ngeci netu twase kuzembeleka vaje vali mu tuyando twakuliseza-seza, nakuzembeleka kuje kwatuzembelekele nakwo Njambi.

Visimo 15:13 Omo vanu vanavwaelela, co vajola-jola, oloni omo vaviilila, co vazeya.

1 Vimyene 8:66 A litangwa lyamucitanu na atatu, Solomoni washikile vanu kuya ku membo avo. Co voshe vamushangazalele, co velukile ku membo avo nakujolela omwo vivezikiso vyoshe vije vyaanene Shukulu Kalunga kuli ngamba yendi Ndaviti na kuli vanu vendi va Isalele.

1 Mizimbu 16:10 Vwaeleleni nakulemesa lizina lyendi lyakujela, voshe vaje vaka-kumulemesa vajolele.

Visimo 12:25 Cishota-mbunge capwa citele cakulema, oloni majwi a ngozi anena kuvwaelela.

Visimo 13:12 Omo cinyangavili cinahu, co na mbunge inoloka, oloni vije ushaka nga unaviwana, co ujolela.

Isaya 30:26 Ngonde ikatwa ceke ngwe litangwa, co ceke ca litangwa cikatuvakana kuvyazima visimbu vitanu na vivali ngwe ceke ca matangwa atanu na avali ku litangwa oyo omo Shukulu Kalunga akakuta vimbandu vya vanu vendi, nakukangwisa mikiki ije yavapupile.

Hoziya 13:8 Njikamilwisa ngwe mbeya uje nazimbalesa vana vendi, co njikamisanyozola. Njikamilwisa ngwe ndumba, nakumisanyozola vipuka-vipuka ngwe cikashama.

1 Samwele 1:8,10 Co munalume wendi Elekana wamwihwile ngwendi, "Hana, omwo vikajo ulinakulila? Omwo vikajo kuwesi nakulya? Omwo vikajo ulinakuvavalesa mbunge yove? Kuma yange munjakushaka yove kunjatuvakanene vana va vanalume likumi ndi?" 10 Hana wavavalesele manene mbunge yendi, co walilile manene nakulombela kuli Shukulu Kalunga.

Myaso 25:16,17 Tengulukila kuli yange yove Shukulu Kalunga, nakunjizivilako mema ku mbunge, omwo njili ange lika, co njinazeye. 17 Njitundise cishota-mbunge, nakunjamina ku tuyando twange twoshe.

Myaso 34:18 Shukulu Kalunga ali muyehi na vaje vanazeye mu vimbunge, ikeye amena vaje vanajeneka cinyangavili.

Myaso 38:8 Yange njinapokoka nakuzeya, omwo mbunge yange ilinakulishoshomwena, co njilila nakukemanga.

Myaso 55:4 Mbunge yange inashulu na lyova, co njinajujuka manene na lyova lya kutsa.

Myaso 61:2,3 Kunjesi na cinyangavili, njitambeka kuli yove, oku njili ku lifuti lya kulyala. Unjtwale ku cimpaka cacivwa, 3 omwo yove wapwa vutewelo vvange, u cimpaka cange cakukola muje njasa kuvanda kuli vitozi vange.

Myaso 62:8 Eni vasamba vange kulaeleni kuli Njambi simbu yoshe! Mulekeni vukalu vweni vvoshe, omwo ikeye muka-kutunyunga.

Myaso 73:26 Muvila wange na mbunge yange vyasa kuzeya, oloni Njambi wapwa nzili yange, ikeye lika injishaka!

Myaso 77:2,3 A simbu ya ñavava njilomba kuli Shukulu Kalunga, vutsiki njijundula mavoko ange nakulombela, oloni kunjalizembelekele. 3 Omo njanuka Njambi, co njilinyenga omo njiyongola, co njizeya manene.

Myaso 86:11 Njilongese yove Shukulu Kalunga, ngeci njononoke vushunga vvove, simbu yoshe njipwise muka-vushunga.

Myaso 109:22 Omwo nji kautu na muka-kujeneka, co mbunge yange inapokoka.

Myaso 112:7,8 Munu wangacije kakazivi lyova akutambula muzimbu wauvi, omo ikeye nakulaela kuli Shukulu Kalunga. 8 Ikeye kakazivi lyova nambe kujujuka, noo namono vitozi vendi vanavafungulula.

Myaso 143:4 Ngecivene, mwonyo wange unazeye, na mbunge yange lalo inaombwa.

Myaso 147:3 Akangwisa vaka-kuzeya mu vimbunge, nakusaka vimbandu vyavo.

Visimo 14:30 Mbunge ya kwoloka inena vukangule mu muvila, oloni cipululu capwa ngwe mbandu ya mukongo.

Muka-Kwambulula 1:13 Na mana ange oshe, njesekele kwilula nakulilongesa vyuma vyoshe vije vilingiwa muno mu kaye.

Njambi nakaluwisa vyuma evi ngeci yetu vanu kesi tuzivisise.

Muka-Kwambulula 2:10 Vyuma vyoshe vinjashakele, njaviwanene. Njalingile senga. Njalyalesele a vyuma vije vinjapangele, co vyoshe evi vyapwile cikandelela cange.

Muka-Kwambulula 2:22,23 Munu akawanao vikajo akuundangana kwoshe kuje kwalinakuundangana ano asi? 23 Matangwa endi oshe, vipangi vyendi vikamunenela vusiwa na tuyando. Nambe ku vutsiki mbunge yendi kuyesi kuhwima. Vyuma vyoshe evi vinapu vyangoco.

Muka-Kwambulula 11:10 Kesi mulishoshomwene mu vimbunge vyeni, nambe kuvavalesa vimbunge vyeni, omwo simbu ya vukwenje vweni inapu yaindondo.

Isaya 30:29 Oloni yeni, vanu va Njambi, mukavwaelela nakwimba ngwe mumukalingi ku vutsiki vwa ciwano cakujela. Mukavwaelela ngwe vaje vaya na vimbendo mu ngila yavo yakuya ku Njuvo ya Shukulu Kalunga, muka-kwamena wa Isalele.

Isaya 57:15 Yange Njambi wa Akamwa ya Vyoshe, na Njambi wakujela, uje

wayoya myaka yoshe. Yange njayoya akamwa na ku mutambela wakujela, oloni njayoya lalo na vanu vaje valikeesa nakutenguluka, ngeci njiindule kusimpa kwavo na cinyangavili cavo.

Isaya 65:14 Vakaimba nakujolela, oloni yeni mukalila nakupokoka vimbunge.

Isaya 66:13,14 Njikamizembeleka mu Yelusalema, ngwe cisemi azembeleka munendi. 14Omo mukamona vyuma evi vilingiwa, co mukavwaelela, cikamilingisa kukala na nzili na vuvwa. Asinoni mukazivuka ngweni yange Kalunga, njikwasa vaje vaka-kunjononoka, co njikamwesa vukalu vwange kuli vitozi vange.

Njlemiya 15:16 Omwo wendekele kuli yange, njatolililile majwi oshe nakuwononoka, omwo njapwa nji wove, yove Shukulu Kalunga Njambi Muka-nzili yoshe.

Njlemiya 24:7 Co njikavana mbunge yakuzivuka ngeci yange njapwa Kalunga. Asinoni vakapwa vanu vange, co yange njikapwa Njambi yavo, omwo vachelukila kuli yange na mbunge yavo yoshe.

Yowano 14:1 Yesu wavalekele ngwendi, "Kesi mulishoshomwene mu vimbunge vyweni. Kulaeleni kuli Njambi, co kulaeleni kuli yange lalo.

Yowano 14:27 Kwoloka njimisezela, kwoloka kwange njilinakumyana. Kesi ngwe muvakana muje vaka-kaye. Kesi mulishoshomwene mu vimbunge vyeni, nameme kesi muzive lyova.

Yowano 16:6 Oloni omwo njinamileka vyuma evi, vimbunge vyeni vili na vusiwa.

Yowano 16:22 Ngecivene, omu mukemwo mucinapu nen, ololo muli na vusiwa, oloni njikamimona lalo, co vimbunge vyeni vikashula nakujolela, kujolela kuje naumo wai akacitundisa muli yeni.

Vilinga vya Miluwa 2:46 Co a litangwa na litangwa valikungulwile mu Njuvo ya Shukulu Kalunga, co valile vyakulya amolika mu vinjuvo vyavo, vakele nakulya na vimbunge vyakujolela na kulikeesa,

Loma 9:2 omo njendeka ngwange njili na vusiwa vwakama manene, nakuvinja kuje kukwesi kuhwa mu mbunge yange,

2 Kolinte 2:4 Njamisonekelele nakuviiilila kwakama manene na ñavava mu mbunge, na misozi yaingi, ngeci kesi njimiviililise lalo embwe, oloni munanguke ngeci kuma njamizema muvavoshe.

Efeso 5:19 Endekeni kuli umo na mukwavo na majwi a myaso na myaso ya ku sañulu na myaso yakujela, imbeni myaso kuli Mwene nakushangazala mu vimbunge vyeni.